



EM 2015/7.2

11. november 2015

Naaja H. Nathanielsen

2016-mi aningaasanut inatsisissamut siunnersuut

(Aningaasaqarnermut aatsitassanullu Naalakkersuisoq)

Ullut qulingiluat qaangiuppata aningaasanut inatsit naammassisussaavarput. Ajoraluartumilli aningaasanut inatsisissami pineqartorpassuit ilaat sulii ersernerlupput.

Aaqqissuusseqqinnissat pilersaarutaasut aningaasatigut qanoq kinguneqarnissaannut sulii ersernerluttoqarpoq. Aaqqissuusseqqinnerit ungasinngitsukkut atuutsinneqalersussat allaffissornikkut kingunerisassaannut tunngasortai sulii ersernerlupput. Angallannikkut nutaamik aaqqissuussinissamut neriorsuutit qanoq aningaasalernissaannut tunngasut sulii ersernerlupput. Nunatut annikitsuinnarmik aningaasalittut aningaasarparujussuit ilisimasaqarfiginngisavut pineqarput – tamannalu isumakuluutigaarput.

Soorlu aningaasanut inatsisissap siullermeerneqarnerani oqartugut, aningaasanut inatsimmik suliaq tassaaginnangilaq siunnersuummi kisitsisinut tunngasoq. Kisitsisilli piviusortaat aamma qimerloortussaavavut. Eqqaamassavarput kisitsisini inuit aalajangikkatsinnit toqqaannartumik sunnerneqartussat pineqarmata.

Innuttaasut tarnimikkut timimikkullu peqqinnerulernissaannik tamatta sulissutiginninnissarput pisariaqarpoq, tassa suliffissaarusimanermit suliffeqalernermit, innuttaasut amerlanerusut ilinniagaqalernissaannut aningaasarissaarnerulernissaannullu sulissutiginninnissarput. Taamaattumillu akileraarutigut, ineqarnikkut inunnullu isumaginninnikkut aaqqissuusseqqinnissanut suliaq maannakkut aallartittariaqarpoq. Kingullertigut meeqqat atugarliortut pillugit oqallinnermit meerartatta periarfissaannik amerlanerusunik pilersitsinissarput qanoq pingaaruteqartigisoq eqqaasinneqarpugut. Suliassaq tamanna utaqqisinneqarsinnaangilaq.

Mittarfinnut umiarsualivinnullu aningaasaliinerit, akileraarutikinnerunissaq, ikiorsiissutit annertusinissaat tapiissutillu assigiinngissitaartut arlariit – tamarmik akeqarput. Aningaasaqarnitsigut pitsanngoriaaseqarnissamut avataaniillu aningaasaliisussanik amerlanernik neriuuteqassagutta pisat marluk pisariaqarput: inunnik isumaginninnikkut politikki tunaartaqarnerusoq kiisalu naalackersuinikkut allannguissuseqarnissaq. Inuttut atukkat kinguaariinni ingerlaqqittarnerisa kipitinnissaannut innuuttaasut periarfissaasa annertunerujussuarmik aallunneqarnissaannut kissaateqarpugut. Naalackersuisullu manna tikillugu takusatsinniit aqutsilluarnerunissaannut inassavagut.

Isumarput naapertorlugu aningaasaliinissat annertunerusut politikikkut silittumik isumaqatigiinnikkut akuersarneqartassapput. Taamatut silittumik isumaqatigiinnikkut tamatta immitsinnut qanillattortariaqalissaagut immitsinnullu tusarnaarluta. Aalajangiinerillu piffissami sivisuumi atuussinnaangussapput. Silittumik isumaqatigiinnikkut allanngujaassuseq takutinneqassaaq. Nunatullu allanngujaassutsimik takutitsinissarput pisariaqartipparput.

Maluginiarparput aningaasanut inatsisissami matumani naalackersuisooqatigiit ataatsimik isumaqatigiissuteqareersimasut. Isumaqatigiissummili tassani nunatta karsiani putup milinnissaanut aningaasanik nassaarnissaq kisimi pineqarpoq. Tassani siunissami pisariaqartinneqartussat pineqanngillat. Soorunami nunatta karsiata amigartoorujussuannginnissaanut qulakkeerinninnissaq aamma pingaaruteqarpoq. Akitsuutinullu isumaqatigiinnerup avataaniikkaluarluta akitsuutit ilaannut taaseqataasimavugut suliamilu peqataalluta. Aningaasaqarnitsinnut akisussaaqataanissatsinniit qimarratiginninniingilagut. Illuatungiliuttuusutut suna tamaat akerleralutigu pissusilersorniingilagut. Siunissallu qanoq iluseqarnissaanut naalackersuinikkut oqallinnerit aallartikkusuppavut. Tamannaluunniit pingaarnersiuermik oqimaatsumik nassataqassagaluarpat. Akitsuutitigut putunik milissuisaqattaarnerminngaanniit maannakkut pingaarnersiugutta pitsaerneruvoq. Aningaasanut politikkerput ikuallannernik qamitsinissanut sungiusarnerinnartut isikkoqassanngilaq. Tamatta siunissatsinnik ilusilersuinerussiaq.

Siullermeerinninnermi aningaasanut inatsisip suliarineqarnerani aallukkusutavut taakkartorpavut. Taakkualu suli atuupput. Ataatsimut isigalugu oqimaaqatigiissitsinissarput, minguitsunut aningaasaliinissarput kiisalu meeqqerivinnik, atuarfinnik ineqarfinnillu iluarsartuussinissat aallukkusuppavut. ICC-p tapersorneqarneratigut tusagassiutinullu tapiissutaasartup atuutseqqinneqalerneratigut demokratimik suli nukittorsaanissarput kissaatigaarput. Aammalu suliffissaaleqisunut inuusuttunullu ilinniagaqanngitsunut iliuitsit annertusarneqarnissaannik kissaateqarpugut. Taamaattumik Piareersarfiit kisiisa

isumalluutiginigagit efterskolit, højskolit, inunnik isumaginninnikkut namminersorlutik suliffeqarfiutillit inuussutissarsiutitigullu ataatsimoorussatut aallarnikkanut tunngasunik inerisaaqataarusuppugut.

Naalakkersuisut aningaasanut inatsimmut allannguutissatut siunnersuutaat kingullit suli takunngilagut. Takusinnaalereerparpulli Aningaasanut ataatsimiititaliaq allattoqarfillu assut ulapputeqassaqsut. Taamaattumik sulilluarnissaannik kissaappagut siunnersuutillu pingajussaaneerneqannginnermini Aningaasanut Ataatsimiititaliamut ingerlateqqinneqarnissaa innersuutigalutigu.